



SIARAN MEDIA

PERNYATAAN POLISI PENGAWALSELIAAN KESELAMATAN NUKLEAR DAN SINARAN MELALUI KAWALAN PERUNDANGAN SECARA CEKAP

6 JULAI 2020, PUTRAJAYA – Jemaah Menteri pada 17 Jun 2020 telah meluluskan **Pernyataan Polisi Pengawalseliaan Keselamatan Nuklear dan Sinaran** yang dibangunkan di bawah skop tadbir urus Akta Perlesenan Tenaga Atom 1984 (Akta 304). Penetapan dasar keselamatan ini akan menjadi pemangkin kepada pematuhan aspek keselamatan oleh pemegang lesen yang menggunakan tenaga atom dalam bidang industri, penyelidikan, perubatan serta bidang lain yang berkaitan.

Pernyataan Polisi Pengawalseliaan Keselamatan Nuklear dan Sinaran ini adalah komitmen Kerajaan Malaysia untuk memastikan jaminan keselamatan nuklear dan sinaran adalah terjamin, melalui kawalan perundangan yang cekap ke atas sebarang aktiviti penggunaan tenaga atom dalam negara. Polisi ini adalah asas kepada sebarang perundangan yang akan digubal pada masa hadapan untuk melindungi para pekerja, alam sekitar, orang awam dan generasi masa hadapan daripada sebarang risiko dedahan atau pencemaran yang tidak diingini.

Ia telah dibangunkan dengan teliti serta kolektif melibatkan pihak berkepentingan seperti Kementerian serta agensi Kerajaan, pertubuhan bukan Kerajaan dan orang awam, melalui sesi libat urus dan kajian soal-selidik yang dilaksanakan pada tahun 2016 hingga 2019.

Pernyataan polisi ini juga menekankan amalan budaya keselamatan melalui pematuhan terhadap parameter dan standard keselamatan sinaran dan nuklear yang selari dengan amalan terbaik antarabangsa yang disyorkan oleh Agensi Tenaga Atom Antarabangsa (IAEA). Pendekatan ini dapat memperkukuhkan kerjasama organisasi kebangsaan dan antarabangsa bagi pembangunan kapasiti dalam bidang keselamatan nuklear serta sinaran secara menyeluruh. Tahap pematuhan keselamatan nuklear dan sinaran yang tinggi akan menyumbang kepada jaminan capaian teknologi baharu melalui peningkatan keyakinan pihak pengeluar teknologi dari luar negara yang akan memberi faedah kepada pembangunan sains, teknologi, perkembangan industri serta pendidikan dalam negara.

Penekanan aspek pembudayaan keselamatan melalui polisi ini akan memperkukuhkan keupayaan kesiapsiagaan dan tindak balas kecemasan bagi tujuan sebarang pengurusan insiden nuklear dan radiologi. Penekanan turut diberikan terhadap aspek ketelusan pengurusan keselamatan melalui komunikasi yang berkesan dan berterusan dalam penyebaran maklumat yang tepat dan konsisten kepada orang awam bagi mengelakkan stigma negatif berkaitan penggunaan tenaga atom.

Pernyataan Polisi Pengawalseliaan Keselamatan Nuklear dan Sinaran merupakan suatu inisiatif kolektif untuk mengukuhkan ekosistem

perundangan di bawah Akta 304. Ia merupakan suatu usaha untuk meningkatkan keyakinan rakyat dan masyarakat antarabangsa terhadap kesungguhan dan keupayaan kawalan perundangan tenaga atom di Malaysia. Maklumat ini boleh diakses melalui laman portal <http://www.aelb.gov.my>

TAMAT

Sebarang pertanyaan lanjut, sila hubungi:

Unit Komunikasi Korporat
Lembaga Perlesenan Tenaga Atom (AELB)
No. Tel: 03-89225888 No. Faks: 03-89223685
Dikeluarkan pada 6 Julai 2020



www.aelb.gov.my



aelb.my



@myaelb



aelb_malaysia



corporate@aelb.gov.my